

07/07/2002

Caci pemimpin bukti ketandusan modal

KUALA LUMPUR: Tindakan Pas menyerang peribadi dan memaki hamun pemimpin negara adalah bukti parti itu mengamalkan akhlak buruk dan ketandusan modal politik, kata Menteri Pertahanan, Datuk Seri Najib Tun Razak.

Najib yang juga Naib Presiden Umno berkata, sudah menjadi kelaziman pemimpin Pas untuk mencaci dan memaki hamun pemimpin Barisan Nasional (BN), apabila tidak ada isu yang boleh mereka gunakan untuk meraih simpati dan undi rakyat.

"Ini kelaziman dan taktik Pas yang cenderung untuk menyerang peribadi dengan memaki hamun pemimpin, dengan memberi gelaran menghina atau kesat. Ini satu akhlak politik yang buruk bukan saja bertentangan dengan agama kita tetapi juga nilai budaya masyarakat kita.

"Memang dari segi modal pun mereka tak ada banyak isu sekarang, malah mereka sebenarnya bertahan. Ini amalan yang buruk, jijik dan terkutuk dari segi agama dan nilai masyarakat," katanya kepada pemberita selepas memeriksa Perbarisan Jubli Emas Maktab Tentera Diraja di Kem Sungai Besi, di sini semalam.

Beliau diminta mengulas nasihat Datuk Seri Dr Mahathir Mohamad kepada pemimpin Pas kelmarin supaya menghentikan sebarang bentuk cacian dan memaki pemimpin BN.

Perdana Menteri yang turut meminta ahli Umno supaya mengelak daripada mengamalkan politik maki-hamun sedemikian, berkata umat Islam mesti berpegang kepada ajaran Islam sebenar dan berbaik-baik sesama umat demi kebaikan semua.

"Kita tak nak maki, itu bukan cara kita. Kita nak suruh depa (mereka) pegang pada ajaran agama. Kalau ada perbezaan pendapat pun, janganlah sampai hendak maki orang, tak baik," katanya ketika berucap di hadapan lebih 15,000 orang yang menunggu kepulangan beliau di Lapangan Terbang Sultan Abdul Halim, Kepala Batas, Kedah, pagi kelmarin.

Najib berkata, pemimpin Pas sepatutnya mengamalkan politik sihat dan demokrasi matang dengan menyatakan kepada rakyat dasar dan program parti, bukan menyerang pemimpin negara jika mereka benar-benar percaya mampu mentadbir negara.

"Sepatutnya kita menunjukkan kita sudah matang dalam amalan demokrasi dan dalam amalan demokrasi yang matang kita memaparkan dasar parti, program parti dan sebagainya. Kita tak perlu serang peribadi pemimpin dan sebagainya," katanya.

Ditanya apakah pendekatan Umno dan BN terhadap serangan Pas itu terutama ketika menghadapi pilihan raya Parlimen Pendang dan Dewan undangan Negeri Anak Bukit di Kedah, Najib berkata kerajaan akan menangkisnya dengan memberi penerangan kepada rakyat mengenai perkara sebenar.

"Kalau mereka menyerang kita, kita akan menangkis balik tetapi kita tak menyerang dengan mengikut contoh buruk mereka. Kita tak menyerang peribadi, kita tak akan keluarkan kata-kata kesat. Cuma kita nak perjelaskan apa yang boleh kita buat untuk negara dan masyarakat di Pendang dan Anak Bukit," katanya.